

# याकूबए ओसरो

## चिथी

आव चिथी परमेस्वरए उमिनताव खासिद लिज़्याव यहूदीरालाई येसुए ओभाइ याकूबए परींद ओरायो ज़। आल साचो यूँ हुपद दान्या येनर रैंःज़्या। परमेस्वरए ल्योदा साचो उयुँ हुबो मिँए ओयाःए वाज़ माःक, उकुइए ब दोज़्याव (याकूब १:२२-२५)। निताव मिँ जाँचरानी ब थंरिज़्या (१:१२-१४), ओकप्तैँ माल्यो धर्म ब दोज़्याव (१:२६-२७), मिँ रैंःद ब मादोव (२:१-७), चाव येन ब दोज़्याव (२:१४-२०), ओसेलाई ब जोगोइज़्याव (३:१-१२), मानुवाताव पाँ माखिम्द परमेस्वरए उधूँल लिद (४:१-१०), गोप्रभु उहुन्या छ्यामलाई ब कींव ज़ नैज़्याव (५:७-९)।

१ डा, गेपरमेस्वर सोनो गोप्रभु येसु ख्रीसनी निसेवा दोज़्याव याकूबए डाल्योनी जे चितराँ पुतराँ ताद लिज़्याव इस्राएली बाह थरलाव परमेस्वरए उमिनत लिज़्यावरालाई जेरो लिज़्या।

दुखरानी थंरिउ तान्या

२अ डानैँ डामेर, भाँती भाँतिलाव दुखर जेदैक 'चाव ज़ लिज़्या' लिद

थंरैच्यो, ३काराव ल्यो ताकिन युँ हुपन्यात जाँचर उहुकिन वाज़ थंरिउ युँ ताज़्या। ४निताव थंरिउ युँ दैन्याए जूँनी नो दुखर उहुकिन घुहुज़्याक। ननी ज़ जे परमेस्वरए ओपाँत थंरिउर, छिबोर, कान्त ज़ जेखत माल्योर तान्या जेले।

युँ सुहुपद पोंखारिन्या

५जो येन जेमासैँए, होए उजूँनी परमेस्वरलाई पोंखारिद निउ ताके।

हो ताकिन ची प्राइंलाई उयुं ग्राल्द उयुं माकैद याज़्याव परमेस्वरए ओल ज़ पैन्या ले। ६खाली नो मिंए, “जुनी ब याँवा ज़,” लिद उयुं सुहुप्द ओपोंखारिउक। उयुं माहुप्द पोंखारि-ज़्याव मिं ते बतासए आदानी होदा ओख्याज़्याव समुन्द्र स्यासो ज़ ताज़्या। ७है जैद निताव मिंए ते, “परमेस्वरनी डानिउ भरी डादैया ज़,” है ओमालिदी ब ताए। ८नोए उयुं खर्क ज़ तोबो पोक माथेरिए।

### गरीब सोनो धनी

६परमेस्वरए ओपाँत बाज़्याव मिं आव मानुवात कान्ल ज़ मागनिसिउ ज़िम्ज़ा उलिदी ब ‘परमेस्वरनी ते घेप्पाल गनिसिउ डालिज़्या’ लिन्या ओसम्जिउक। १०धनी मिंए फरी ‘डास लिज़्याव भरी परमेस्वरनी ते काता ज़ माले’ है लिन्या ओसम्जिउक। नो धनी मिं ते वास वैद उथंज़्याव मिताव ज़ तान्या ले। ११ख्योव नमल निमी बनै ग्रेप ग्रेप राव बतासस उहुक छी भरी थँद वासराए यावैर ब गलिद याजोबन ज़ माज़्या। हो मिताव ज़ मिं ब धनी उलिदी ब ओल उसिक ओधन ब खेमज़्या, उमिन ब माज़्या।

### जाँचरानी थोरिन्या

१२धो सहिउ दुखर सहिज़्याव मिं असिक दैव मिं ज़। निताव जाँचरानी उथोरिकिन नोए परमेस्वरनिकाव अजम्बरी जुनी दैरिज़्याव। परमेस्वरए ओल्योदा यायुं थू जैज़्यावरालाई नो जुनी यान्या ग्राका डादाकिन ज़ नैद ओराएज़्याव। १३खाली सुवा-रालाई यायुंए बिप्यादा लाँवा लाँवा ओराजैकिन आव जाँच परमेस्वरनी हुव ज़ है तालिरक। यायुंए ज़ है याजैज़्याव। परमेस्वरए उयुं माचावदा खर्क ज़ माबाए, छुतरालाई ब माचावदा बान्या युं जैद मारायो। १४बुरू मिंर या यालोभए ज़ यायुंलाई माचावल पारैज़्यार। १५ननी ज़ यायुंलाव माचाव पाँए माचाव येन ब जमैज़्याव। नकिन नो माचाव येन ओयोवत सिन्या सजाल भाःव दोज़्याव।

### चाव भरी परमेस्वरए ल्योनी ज़ हुज़्या

१६डायुंलाव डानैं डामेर, जे ताभुकि-च्यो। १७गेलाई जुरिद हुज़्याव चाव सोनो छैव भरी खर्क ज़ मातोसिज़्याव चुम चुमोलाई पलाँव जैज़्याव

स्वर्गताव गेबाबु परमेस्वरए ल्योनी ज़ हुज़्या। १८ओरासिजैव भरिरानी गेलाई 'सा:रोल ड़ाताव सै मिताव घतारक' लिन्या उयुं ओतावए ज़ साचो ओपाँनी ओल ओथोल जर्मैसिक्यो।

### परमेस्वरए ओपाँ थैव ब ताके, दोव ब ताके

१९डायुंलाव डानै डामेर, आव ब सैच्यो, चाव पाँ थैन्यात भा:सिद लिच्यो, पाँन्यात तहस पाँच्यो, जेरिस हतप्त ताचोक। २०काराव ल्यो ताकिन मिँए उरिसनी परमेस्वरए ओपैँज्याव मिताव धर्मलाव येन खर्क ज़ मासयो:धुव। २१है जैद जेसकाव लिज्याव कुबानी बानीर स़ोनो बले:न्या पाँर रास्द उघुरिउर ताद जेलाई बाँचैधुज्याव जेयुंलाव वास्सिउ परमेस्वरए ओपाँ चावस सपरीव ताके।

२२खाली जे परमेस्वरए ओपाँ थैज्यावर वाज़ मा:क, दाज्यावर ब जैसिउ ताके, मानी जेक्याँलाई जे ज़ धोका यान्या जेले। २३जोए परमेस्वरए ओपाँ थैद ओमादोकिन, नो मिँ धर्पनल अइज़ उचिऊसिउ मिताव लिज्या। २४नो मिँ नल चिऊसिद ननी ओबाव प्राइँना 'डा इताव डाल्यो' लिन्या ब में:ज्याव। २५खाली जोए पापनी पले:ज्याव ओखत माल्यो

परमेस्वरए ओकानुनलाई बनै चावस चिऊद मामें:द थैद ओदोकिन, ननी ज़ परमेस्वरए ओअसिक दैन्या ले।

### साचो ओकप्तैँ माल्यो धर्म

२६जोए, "डा ते धर्मी ची," है लिज्या, खाली ओसेलाई ओमाजोगोइधुकिन, नो मिँ ओलनी ज़ भुकिज्या, स़ोनो ओधर्म ब अनाकलाव ज़ ताज्या।

२७गेबाबु परमेस्वरए ओड़ाक साचो ओकप्तैँ माल्यो धर्म इतावनी ज़ ताज्या — तुहुरा तुहुरीर स़ोनो राँदी मेंमारालाई यादुखल चिऊन्या, स़ोनो आव मानुवाताव पापरानी अछतड लिद छैँवस लिन्या लिज्या।

### मिँ रँ:द तादोच्यो

२ अ डानै डामेर, ज़गै मगैव गेप्रभु येसु ख्रीसए ओपाँत जेयुं हुबोर जेतावए जे मिँ रँ:द तादोच्यो। २परमेस्वरए ओपाँत जेदुप्सिक तोबो उकुइत सुने कुइची ल्यो स़ोनो ओक्वार ब बनै चाव चाव ल्यो उहुकिन, फरी तोबो ओक्वार थाकना बुरूमो गरीब उहुकिन, ३जे नो चाव क्वा क्वाइसिद हुवलाई वाज़, "तैँत चुसिन्के," है जेदोकिन, फरी नो माचाव क्वा क्वाइसिद हुवलाई, "नँ नक ज़ च्याँ:सिद लिन्के, की जाँ मेकसै लिन्के," है जेदोकिन, ४जे जेखाल

निताव मिँ रँ:द जेदोज्यावए, तँनी ज़ जेदोव रँ:के।

५ डायुँलाव डानैँ डामेर, आव तामे:च्यो, परमेस्वरए ते भन मानुवा-ताव गरीबरालाई ज़ युँ हुण्ण्याल धनी थःरैद यानैव। परमेस्वरए ल्योदा यायुँ जैज़्यावरालाई ओराज्या यान्या याका ओरायो ब नोरालाई ज़। ६ है जैद जे निताव गरीबरालाई सोन्या मा:क। जे ज़ जेसैँज्या, जेखिरी पसिद अदालतदा स्लेल्द लाँज्यावर धनीर ज़ ताज़्यार सानी। ७ जे जेक्याँत लिज्याव ख्रीसए चाव उमिन बले-द लःज्यावर ब नोर ज़ ताज़्यार सानी।

### परमेस्वरए ओराज्यालाव कानुन सयो:न्या

८ जे धर्मसास्त्रलाव प्राइँरानी ओचाहित ल्यो परमेस्वरए ओराज्या-लाव कानुन जेसयो:किन नो ज़्यासो लिज्या। नो कानुन आव ज़ — जेक्याँलाई किताव जेसमारिज्या, छुतलाई ब हिताव ज़ समारिउ ताके। ९ खाली जे आव कानुन मादाद मिँ रँ:द जेदोकिन पाप दाद परमेस्वरए ओकानुननी जेखत ल्योर जेथःरिज्या। १० जोए परमेस्वरए ओकानुन भरी माबिरैद ओदोदी ब फरी तोबो

ओमासयो:धुकिन नो कानुन भरी ओपो:स ज़ ओमादोव मिताव ज़ थःरिके। ११ जे ज़ जेसैँज्या, अर्काए ओज्याए ल्योदा माबान्या कानुन सोनो मिँ मासै:न्या कानुन ब तोबोए ओया:नी ज़ हुके। है जैद जो अर्काए ओज्याए ल्योदा ओमाबादी ब मिँ ओसै:किन, नो मिँए परमेस्वरए ओकानुन मासयो:द ओगल्ती ल्यो ज़ थःरिज्या। १२ जे तछा पापनी पले:ज्याव परमेस्वरए ओकानुननी जेफाल्सिरिज्या लिन्या याका दाद दाव ब ताके, पाँव ब ताके। १३ छुतलाई उयुँ मानाज्याव मिँ ओललाई ब परमेस्वरए ओफालो छ्याम उयुँ नान्या माले। फरी छुतलाई उयुँ नाज्याव मिँ हो छ्याम परमेस्वरए ओसजानी पुलुस्न्या ले।

### युँ हुण्ण्या सोनो येन दान्या

१४ डानैँ डामेर, जो मिँए ओया:ए वाज़ 'परमेस्वरए ओपाँत डायुँ हुण्ण्या' है लिद येन ओमादोकिन, नोए ओपाँ अनाकलाव ज़ ताके। निताव युँ हुण्ण्यानी कै जैद ओबाँचिधुरिज्याव? १५ जेस परमेस्वरए ओपाँत बाज्याव तोबो मिँ ओक्वार ब माल्यो, ज्यावए ब माथैँज्याव उलिकिन, १६ जेनी जोए नोलाई 'चावस बानी, नफू तसी ज़्याद



मुइंवल स्यांनी' लिद ओयाःए वाज्र है दाद चाहिज्याव भरी काता ज़ ओमाएकिन, नो काता ची तायादा? १७हो मिताव ज़ परमेस्वरए ल्योदा युं हुप्या ब याःए वाज्र ताकिन अनाकलाव ज़ ताज्या। साचो युं हुबो मिंनी ते ओयेन ब रैंःज्या।

१८खाली सुवाराए, “परमेस्वरए उमिनतावर ते ख्वार अइज्र यायुं वाज्र हुप्यार याताज्याव ओल्यो, ख्वार बनै येन दान्यार याताज्याव ओल्यो,” है लिज्याखेरहो। डा नो है लिज्यावराए जूनी है डालिज्या, “हिताव ताकिन येन मादाद जेयुं जेसुहुबो डालाई सतैंदचौंचिके। डा फरी जेलाई डायेननी ज़ डायुं डसुहुबो सतैंद डाय्याच्या।” १९नैं, “परमेस्वर तोबो वाज्र लिज्या,” लिन्याक पै नयुं नसुहुप्याव ते चाव ज़। खाली नाःपै ते माचाव पुरूसराए ब भुम भुम गूद यायुं सुहुप्यार। २०खाली नैं निताव माचाहिउ पाँज्याव मिं, येन मादाद युं सुहुप्या भरी अनाकलाव ज़ लिज्या लिन्या खर्क नसैरिज्याव?

अब्राहामए उयुं हुबोनी ज़ येन दोक्यो


२१गेपुर्खा अब्राहामए परमेस्वरए है ओदोव मिताव ओजा इसहाकलाई

थानत चरैःन्या उयुं ओमाकैवए नो ओदोव ओयेननी ज़ परमेस्वरए ओड़ाक धर्मी थोरिके। २२उयुं उसुहुबो मिताव ज़ ओयेन ब दोक्यो, ओयेन ओदोवनी फरी उयुं उसुहुबो ब सयोःक्यो। २३ननी ज़ धर्मसास्त्रलाव सर्सिउ पाँ योःके। नलाव सर्सिउ आव ज़, “अब्राहामए परमेस्वरलाई उयुं उसुहुबोनी ज़ परमेस्वरए नोलाई धर्मी ज़ थरैक्यो।” है जैद अब्राहामलाई परमेस्वरए ओनैं ज़ है मनी दोकेर। २४ननी ज़ गेसैंज्या, युं सुहुप्यानी वाज्र माःक, युं सुहुप्येन ब दोकिन वाज्र मिंर परमेस्वरए ओड़ाक उयुंलाव मिताव थोरिज्यार। २५हो मिताव ज़ धर्मसास्त्रलाव राहाब पातर्नी ब नो इस्राएलीराए यारापरीं देस जाँचिना हुवनिलाई चावस समारिद मोंद छुत येमनी उनिपरींवे नो मेंमा ब ओदोव येननी ज़ परमेस्वरए ओड़ाक धर्मी थोरिके। २६किताव उस० माल्यो कयाँ सिउ ताज्या, हिताव ज़ येन मादाद ओयाःए वाज्र ‘डायुं हुप्या’ है लिज्याव मिं ब हिताव ज़ ताज्या।

सेलाई जोगोइन्या

३ अ डानैं डामेंर, परमेस्वरए ओपाँ पैन्यात कोभा मिं





(३:३)

केर्घे ताजैसिच्यो। अर्कालाई है दाज्यावए नो येनत उबिरैकिन परमेस्वरए नोलाई उपुर्कावराकिन कर्रास फाल्रिज्याव लिन्या जे ज्ज जेसैज्या। २गे प्राइँए कुधु पाँ बिरेद गेदोज्या। खाली जो मिँए ओसेलाई जोगोइद पाँज्या, हो वाज्ज ओखत माल्यो पैधुन्याकाव ताज्या। निताव मिँए ओक्याँ भरिलाई ब काबु जैधुज्याव। ३नाःल्दिउ घोरालाई ब काबु जैन्याए जूनी ओयाःल लगाम भ्नाःद गेएकिन जोदा गेयुँ लिज्या होदा ज्ज गेलाँधुज्या। ४घेप्पा री जहाज चलैज्याव मिँए ब जती घ्योःव बतास उहुदी ब जहाजलाई दल्कैज्याव तकेज्जा दाबीए जोदा उयुँ लिज्या होदा ज्ज लाँज्याव। ५हो मिताव ज्ज गेक्याँताव तकेज्जा गेसेए ब

‘अइ डाजैरिज्या, है डाजैरिज्या’ लिद छे छे डम्मिसउर पाँज्या।

तकेज्जा मेंःए उभिलिङ्गाए ब नाःल्दचालु बनर चुयाप याख्या-ज्याव। ६हो मिताव ज्ज गेसे ब तोबो मेंः स्यासो ज्ज लिज्या, आव गेक्याँताव भरिरानी बनै अपराधी लिज्या। नाःल्दिउ गेक्याँलाई ब नोए ज्ज बले-ज्याव। नर्गलाव मेंः रैद गेजुनीलाई ब हिप्दचासिज्याव।

७प्राइँ किसिमलाव जै जन्तुर, नम-ताव भुज्यावर, नामलाव गोल्ज्यावर, रीलाव लिज्यावर, प्राइँलाई मिँराए ज्ज याराउगुनैज्यार। ८खाली आःपै सेलाई ते सुए ज्ज माउगुनैधुव। नो बनै ओधास ल्यो खर्क ज्ज चिम दाद मालिन्या छे छे डम्मिसउ लिज्या। ९नो सेए ज्ज गेबाबु परमेस्वरए उमिन ब सघ्योःद गेएज्या,

नो सेए ज़ परमेस्वरए उसुरूपनी जैसिउ  
मिँलाई सराप ब गेएज्या। १०तोबो  
याःनी ज़ असिक ब पुलुस्ज्या, थल्ल्या  
ब पुलुस्ज्या। अ डानैँ डामेरँ, इताव ते  
माताव परिन्त्या। ११तोबो रीमुलनी ज़  
डमो री स़ोनो काव री उहुज्याव रो?  
१२काता नेभारा सींत जैतून ओसैज्याव  
रो? सैँ जोम्परसैत नेभारा ओसैज्याव?  
हो मिताव ज़ काव रीमुलनी खर्क ज़  
डमो री माहुए।

### परमेस्वरए ओयेन खिस्द मादान्या

१३जेनी सुवार परमेस्वरए ओपाँ  
सैन्यार जेलिकिन नोए मासघ्योःसिद  
तहस ओदोज्यावनी वाज़ सैन्या गराँन्या  
ओरैँःक। १४फरी जो मिँए खिस्द  
स०द ओदोकिन नो मिँ सघ्योःसिद  
परमेस्वरए ओपाँलाई ब बलेःज्याव।  
१५नो खिस्ज्याव मिँए उयुँ परमेस्वरए  
ल्योनी हुव माःक, नोए उयुँ मानुवानी  
स़ोनो सैतानए ल्योनी हुव ची।  
१६काराव ल्यो ताकिन जोक क्याँलाई  
तान्या स़ोनो खिस्न्या ताज़्या, होक  
माखैन्त्या स़ोनो इसिन्या वाज़ ताज़्या।  
१७परमेस्वरनी हुज़्याव युँ ते छैँव ब  
ताज़्या, सखैव ब दोज़्याव, उघुरिउ  
बोमो युँ ब जैदचाव दोज़्याव, गराँव  
युँ ताद चाव येन दाव परीँव दोज़्याव,

ओकण्ठैँ माल्यो, मिँ रँःद मादान्या जैव  
ब दोज़्याव। १८परमेस्वरनिकाव युँ  
दैव मिँए ओपाँ बनै चाव धुर स्यासो  
ताज़्या। जोक वास्ज्याव होक ज़  
प्राइँलाई सखैद परमेस्वरए उयुँलाव  
मिताव जैव दोज़्याव।

### क्याँलाई तान्या वाज़ खिन्त्या माःक

४ कै जैद जे जेखार्ल इसिन्या,  
जगरा दान्या उपुलुस्ज्याव?  
नो भरी जोत ब युँ मानैधुद क्याँलाई  
तान्या वाज़ खिन्त्यानी ज़ ताज़्या।  
२लोभ दाद जेयुँए ओपैँज्यावलाई  
जेमादैकिन जेडालाव परिउ भरिलाई  
खेमो जेपैँज्या, स़ोनो जोत जेमी तूज़्या  
होत इसिद जगरा ब जेदोज्या। नो  
जेपैँज्याव भरी परमेस्वरस जेन्किन  
जेदैखेहो ज़। ३खाली माचाव युँस  
क्याँलाई तान्यानी वाज़ जेन्किन ते  
परमेस्वरनी ब जेमादैए।

४ए निताव सतत मालिज्याव  
मिँर, काता आव मानुवाताव पाँ  
खिम्ज्याव मिँर परमेस्वरकिन तँदा  
लिज्यार लिन्या जेमासैँए रो? जो  
आव मानुवाताव ताज़्याव पाँए ओनेँ  
जैसिज्या, नो मिँ परमेस्वरनी तँदा ज़  
ताज़्या। ५गेजुँनी धर्मसास्त्रलाव सर्सिउ  
पाँ अन्नाकलाव माले। नल, “गेयुँलाव

बास दाज्याव परमेस्वरए उपुरूसए ते 'डाल्योदा वाज्र यायुं थू याजैकिन ताखेहो' लिद उस० तरा चींज्याव।" ६खाली नो पुरूसए उयुं गेल्योदा भन ज़ ग़ाल्ज्या। है जैद धर्मसास्त्रल,

“स०द सघ्योःसिज्यावरानी  
परमेस्वर तँदा ज़ लिज्या,  
सज़िम्सिज्यावरए ल्योदा ते  
उयुं ग़ाल्ज्या।”

७है जैद जे परमेस्वरए उधूँल लिद सैतानए ओपाँलाई भैःद जेमाएकिन ओल ज़ धोंःद बान्या ले। ८फरी परमेस्वरए ओल्योकसै बाकिन ओल ब ल्योकसै हुज्या। जे पापीर, मादान्या दाव परींज्याव जेकुइलाई फरी दाव ताएच्यो। नेयुं दाज्यावर जेयुं छैँव जैचिके, पाप दान्यादा जेभाःज्याव जेयुं फरी नदा ताभाःच्यो। ९सोगो दाद जेयुं ओघरक। मानुवाताव पाँत थाँतस रेंद जेलिज्याव ब ओतोसिक। ल०द जेसासोत ब जेयुं माचाव ओदोवक। १०परमेस्वरए ओड़ाक सज़िम्सिद फुलुप्सिकिन ओल ज़ सोचोइद सघ्योःन्या ले।

नै मेंलाई सतेद पाँन्या माःक

११डानैँ डामेरं, जे जेल सुलाई ज़ सतेद पाँन्या माःक। जोए नैँ मेंलाई

सतेद ओखत पले-दिज्याव, निताव मिँए परमेस्वरए ओकानुनकिन तँदा जैसिद ओपाँलाई ओखत ल्यो जैज्याव। निताव ओखत ल्यो जैज्याव मिँए परमेस्वरए ओकानुन मादाद भन परमेस्वरए ओकानुनलाई ओफाल्ज्याव मिताव ज़ रैँःज्या। १२कानुन जैद कानुननी फाल्ज्याव ओल परमेस्वर वाज्र लिज्या। नोए बाँचैव ब दोज्याव, खेमो ब दोज्याव। है जैद जे नैँ मेंलाई कै जैद 'इताव हिताव' है दाद सतेन्या ओताज्याव?

सघ्योःसिद पाँज्याव मिँ

१३जेनी ख्वाराए अइ जेलिज्याखेहो, “आछिम ताव, पराःती ताव तोबो सहरल बाद नल तबर्सवा लिद पसलर थाँद पैसार डाकमैया ब,” है जेलिज्याखेहो। निताव मिँराए आव डापाँ थैचिके। १४‘पराःती अइ डातारिज्या’ लिन्या जे जेमासैँए। जे कोहो स्यासो वाज्र जेलिज्या। नो कोहो होक ज़ ताज्या, होक ज़ माज्या। १५जे बुरू, “परमेस्वरए उयुं ओताकिन गे बाँचिद अइ गेजैरिज्या, है गेजैरिज्या,” है ल्यो परिन्या। १६है जेमालिकिन जे ज़ सघ्योःसिद ओघाँत ज़ जेपाँव रैँःज्या। निताव सघ्योःसिद पाँन्या बनै



माचाव लिज्या। १७ है जैद जोए चाव येन दाव परिए लिन्या सैज्यावत ब मादोव, होलाई पाप लागिस्ज्या।

### अर्काए ओक्याँत धनी तावर

**५** ए धनी तावर, आव डापाँ थैचिके। जेक्याँत हरिज्याव छे छे डम्सिउ दुखए जूनी जेयुँ माचाव जैद घर्चिके। २ जेधन भरी ब उपुव मिताव ज़ ताद ले, जेक्वा भरी ब ओनाँःव मिताव ज़ ताद ले। ३ जेसुन चाँदीर ब पीज्यासो मिताव ज़ ताद ले। नो पीज्यासो ज़ जेसाची ताद फाल्न्या छचाम मेंःए माँःती जेक्याँलाई ज़्यान्या ले। है जैद नो जेदुप्ज्याव धन भरी आछिमकावए जूनी माःक, फाल्न्या छचामकावए उजूनी ची। ४ नो जेएँःलाव येन दाज्याव बाहोज्यारालाई याःथन प्राइँ मायाद येन वाज़ दाव जेरापरीकिन नो जेमारायो भरी जेडैत ज़ तान्या ले। नो बाहोज्यार याक्लिज्याव माहान परमेस्वरए थैरिज्याव। ५ जे आव मानुवात जेयुँनी हुव भरी दाद थाँतस लिद पल्सिन्या छयामकावए उजूनी बनै जेसोसोइसिज्या। ६ भन जेकिन तँदा माजैसिद काता ज़ मापाँज्याव धर्मीलाई मनी खत लैद जेसैःके।

### दुखर सहिद गेप्रभुलाई कींव ताके

७ जे डानैँ डामेर, गेप्रभु फरी ओमा-हुवा पै जेयुँ थू जैद कींद नैच्यो। एँःलाव येन दाज्यावए ब ओवासो धुरलाई ओमामीःवा पै कींद नैज्याव। सोनो 'नम मावारिज्या' लिद नमलाई ब उँध्याली उभ्याली चिरुव ज़ नैज्याव। ८ हिताव ज़ जे पाला खीसलाई ओमाहुवा पै 'जुनी ब हुया ज़' लिद जेयुँ सुहुप्द कींद नैचिके। ओल हुन्या तादाड माले, लापक ज़ लिज्या। ९ डानैँ डामेर, जे छुतए ओडैत तागन्गनैच्यो। जे अर्काए ओगलती अनाकल ज़ पलेःद जेएकिन नोकिन जे जेगलती भन ज़ रैँःज्या। नो जेयेन फाल्न्या जेयामक ज़ च्याँःसिद ले।

१० डानैँ डामेर, परमेस्वरए उमिन हाइज्याव अगमबक्ताराए किताव दुखर सहिद थंरिद लिकेर, हिताव ज़ जे मनी थंरिद लिच्यो। ११ नो थंरिद लिज्यावरालाई गे धन्याकावर ज़ है गेरादोज्या। अय्यूबए मनी बनै धो सहिउ दुखर दैद उसहिउत परमेस्वरए हाः चाव ओजैव जे ज़ जेसैँज्या। है जैद परमेस्वरए उयुँ ओनाज्याव उयुँ ओयाल्ज्याव ननी ज़ रैँःज्या।

**आगल्या पाँ तापाँच्यो**

१२ डानैँ डामेर, प्राइँरानी घेप्पा पाँ आव ज़ — नाम नम अथबा जोराए मिनर तादी ब हाइद किज्या ताभाःच्यो। बुरू जेपाँक हैज़लाई हैज़ लिच्यो, माःकलाई माःक ज़ लिच्यो। आगल्या जेपाँकिन गलती थंरिन्या ओछ्यास लिज़्या।

**ओजोरो हुज़्यावलाई पोंखारिदचान्या**

१३ जेस सुवार दुखल यालिकिन नोए परमेस्वरलाई ओपोंखारिउक। फरी सुवार रेंवर यालिकिन नोए परमेस्वरए उमिनत भजन ओगैवक। १४ जेस सुवार याजोरो उहुकिन होए मन्दलीलाव स्ेररालाई ओराखुलोक। नो स्ेरराए ओजोरो हुवए ओडैत परमेस्वरए उमिननी मास थीदचाद पोंखारिद ओएरक। १५ परमेस्वरलाई युँ सुहुपद पोंखारिकिन ओजोरो हुज़्याव गरँन्या ले। ओजोरो हुवलाई ओल

परमेस्वरए ज़ सोचोइज़्याव। फरी नो मिँए पाप ओदोव ताकिन, ओपाप ब क्यालिसिज़्या। १६ सगराँसिन्याए जूँनी जेदोव पाप जे जेल माम्रोद भेंःद जे जे पोंखारिसिच्यो। धर्मी मिँए परमेस्वरलाई ओपोंखारिउ पाँए बनै घ्योःव येन दोज़्याव। १७ एलिया ब गे स्यासो मिँ ज़ ओल्यो। होए ‘नम तावाक’ लिद ध्यानस ओपोंखारिक आव नामल स्ोरिम छ मैना भरी नम वा ज़ मावाके। १८ फरी ‘नम ओवाक’ लिद ओपोंखारिक नम वाद आव नामल अनर बनै ज़ ताके।

**पाप दाज़्यावलाई सोवोल्न्या**

१९ अ डानैँ डामेर, आव ब सैँच्यो, जेनी सुवार परमेस्वरए ओयेमनी ओल्द ओबाकिन जोए नोलाई सोवोल्द रैज़्याव, २० होए नो मिँलाई नर्गनी सोवोल्द ओरैव मिताव ज़ लिज़्या। कुधु ओपाप ब कपद ओयो मिताव ज़ लिज़्या।